



En memoria da Marcel Deragisch-Cadruvi

*Adina cu nus patertgein vida Tei,
scauldan radis sulegl nies intern.*

*Nos cors tegnan tei ferm,
sco sche ti fusses mai ius.*

Il Marcel ei naschius ils 22 da settember 1945 sco tierz affon da Toni ed Emma Deragisch-Feldkircher. La tatta Emma era oriunda dall' Austria ed ei vegnida a Sedrun sco cuschiniera el hotel Cruna, nua che ella ha lu era empriu d' enconuscher siu um

Toni. Sch' il Marcel raquintava da sia mumma, lu munchentava el buca da menziunar las bunas tratgas che ella metteva sin meisa.

Sia affonza ha il Marcel passentau a Sedrun sin Gionda ella casa che el ha pli tard habitau ensemes cun sia atgna famiglia. Suenter haver frequentau la scola obligatoria a Sedrun, ha ei era pil Marcel giu num da far in emprendissadi. El ha anflau ina plaza d' emprendissadi a Flawil el cantun Sogn Gagl sco pégner e tschentaplattas. Havend finiu igl emprendissadi ha el aunc passentau entgins onns egl jester. Cuort suenter siu retuorn ella patria tuatschina, han el, siu bab, siu frar Anton e sia sora Erica stuiu prender cumiau dalla zun premurada e buna mumma Emma. Biebein in onn pli tard, ei il frar Anton morts sin moda tragica. Restai anavos sin Gionda ein il Marcel e siu bab, la sora Erica era da quei temps gia serendida en claustra.

Suenter las grevas fridas, han las nozzas culla giuvna Annamaria Cadruvi da Ruschein igl onn 1971 dau al Marcel gronda satisfacziun e contentientscha. Ord quella lètg ein naschi 4 affons. Ina greva frida per la giuvna famiglia ei la mort dil pop Mario stada, dil qual ils conjugals han stuiu prender cumiau gia enzacons dis suenter sia naschientscha. Tgei benedicziun ch' il Patric, il Dominik e la Maria ein stai sauns e taffers ed han fatg a lur geniturs dapli plascher che quitaus. Igl onn 1978 miera il bab dil Marcel, il Toni, che habitava ensemes cun el e sia famiglia en casa sin Gionda.

Varga 40 onns ha il Marcel luvrau tier la firma Murer sco manischunz da camiun. Sper la laver quotidiana luvrava el sco tschentaplattas ed en bein enqual casa ella Val Tujetsch (ni era odlunder) anflan ins lavurs accuratas fatgas dil Marcel. El ei segidaus bugen e plein anim cun amitgs e vischins tier tuttas lavurs da mistergner. Era els dacasas da sia feglia Maria e ses fegls Patric e Dominik ha il Marcel schau anavos fastitgs da siu bien maun e siu egl pils detagls decisivs che regordan vid las bialas e legras uras da laver ensemens cun el.

Il Marcel ei staus in fetg bien e premurau bab, che ha dau sustegn a ses affons, ed era mintgaton alzau la vusch sch' ei fageva basegns; adina cun l' intenziun da vuler mo il meglier per ses cars. Grond plascher ha el era giu da sia biadia Riana e ses biadis Sven, Nico e Jan. Els han astgau guder in tat leger e plein humor, era sch' el fuva mintgaton in tec in «fuchser» sco nus schein en Tujetsch.

Gia cun ses affons ha il Marcel fatg bein enqual viadi, repetidamein era a Paris en claustra tier sia sora Erica. Era ses parents austriacs haveva ei num da visitar regularmein; il Marcel fuva loschs sin sias ragischs austriacas ed ha adina mantenui il contact. Suenter ch' ils treis affons han giu bandunau gl' igniv sin Gionda e cunzun suenter sia pensiun, ha il Marcel ensemens cun sia Anni saviu dedicar dapli da siu temps liber a quella communabla occupaziun preferida. Sch' ins telefonava eri per propri da dumandar nua essas e buca co vai cun vus.

Ira cun auto mava il Marcel per propri fetg bugen, negin viadi era memia liungs per el ed aunc sche sia cara haveva pli che avunda, schischeva ina via puleina tuttina aunc en. Problematic vegneva ei pil Marcel pér lura, sch' el veva da carrar sur ina punt pulit aulta, lu mavan las stèles, pertgei ella altezia ha il Marcel adina giu empau battacor. En quellas situaziuns – e mo quellas – surschava el la roda da menar all' Annamaria, schiglio füss el guess semenaus. Lur viadis han menau els en biars loghens svizzers, mo era egl exterior han els passentau naven dalla Bretagne entochen Canada bia bialas, legras e ventireivlas uras ensemens.

Igl unviern vargau han tut surura las forzas dil Marcel schau suenter, ed era cun tut la tgira vegneva el buca propri en gamba. Tut vegneva pli stregn ed il mars da quest onn ha in mal il tgau stermensus sfurzau el en letg ed en tractament dil miedi pli intensiv. Igl avrel ha ei giu num da serender el spital per controllas pli grondas e bugen ni nuidis ei il Marcel s' adattaus. El spital

han ei lu beinspert constatau ina malsogna maligna e fetg greva. Il Marcel leva buca bandunar sia famiglia ed ha cumbattiu ton sco el ha pudiu, e tuttina, la malsogna ha la finfinala priu surmaun. Ils 10 da matg 2016 eis el sedurmentaus ruasseivlamein el spital a Cuera.

Ussa ein biebein 7 meins vargai dapi che nus havein stuiu prender cumiau da nies car um, bab, tat, frar, quinau e sir; el maunca mintga di e la largia ch' el ha schau anavos ei gronda e dolorusa. Cun il Marcel havein nus stuiu schar ira in carstgaun plein carezia per ils ses, in carstgaun pleins da humor ed in grond plascher da viver, cun plans e giavischs e siemis. A tut quels che han accumpignau ed accumpognan nus aunc adina atras quei temps da tristezia ed encarschedetgna, admettein nus in cordial engraziament.

Marcel, ti mauncas a nus schi fetg. Ti restas fermamein en nos cors